

(գր. 1236 ին) մագաղաթեայ պահպանակին վրայ հետեւեալ յիշատակարանով. «Եղբայր բարի, գիտացիր որ ես Մարտիրոս մեղաւոր և անարժան՝ կոչիմ եպիսկոպոս Մարտնոյ, և դրացի Գառայ յԱմիթի Տիառապէքը. ես Երուսաղէմ գնացի և այնկից ի Պետրոս և Պողոս ի մեծն Հռոմ, և անկից ի Ս. Յակոբն ի Կալիցի և դարձայ, յայս ժամն էր թվական Հայոց ԶՂ (1541) ամի որժամ դարձայ ի Ս. Յակոբայ»:

Աւելի ուշ՝ 1609 թուականին կը հանդիպինք Ունիթոռներու կարգէն՝ Օգոստինոս Բաջենց ապարանեցիին, որ յետոյ Նախիջևանի եպիսկոպոս կ'ըլլայ: Սա մեկնելով Սպահանէն կ'անցնի Ռուսաստան — ինչպէս որ ինք իսկ կը պատմէ իր կենսագրական — ուղեգրական յուշերուն մէջ՝ — յետոյ Լեհաստան, Գերմանիա, և հուսկ Սպանիա: Հետաքրքրական են իր տպաւորութիւնները նախ Լիզպոնա և Մատրիտ քաղաքներուն, Էսկուռիալի վանքին, Սալամանքայի, Մամորայի և վերջապէս Ս. Յակոբի Ուխտավայրին: Երբ իր ուխտը կատարած Մատրիտ կը վերադառնայ՝ կը հանդիպի հոն հայ եպիսկոպոսի մը. թերեւս աս ալ ուխտաւոր:

* * *

Անցնինք այժմ Մարտիրոս եպիսկոպոսի ուղեգրութեան մանրամասնութեան:

Ինչպէս ըսինք, ան Երզնկայէն կը մեկնի 1489 ի Հոկտեմբեր 29 ին և կու գայ Կ. Պոլիս: Յաջորդ տարին 1490 Յուլիս 11 ին՝ ուղեկից ունենալով Վրթանէս անուն սարկաւազը՝ կը նաւէ դէպի Վենետիկ՝ զոր կը նկարագրէ մեծ զարմացումով ըսելով թէ «ամէն մէջ ծովն է շինած»: Միայն՝ Ս. Մարկոսի փոքր հրապարակին մէջ երկու կոթողներն յիշած ատեն կ'ըսէ, «մէկին վրայ թեւաւոր առիւծ» Ս. Մարկոսի նշանակը. բայց կը սխալի երբ «մէկալին Ս. Գէորգ է կանգնել» կ'ըսէ. վասն զի վերջինս կը ներկայացնէ Ս. Թէոդորոս: Ներսէս հայկազն էր որ Գոթացիներուն յաղթելէն վերջ հոն՝ ուր այսօր Ս. Մարկոս կը կանգնի՝ շինած էր տաճար մը յանուն Ս. Թէոդորոսի 552 ին և նոյն Սուրբը պաշտպան հռչակած Վենետիոյ: Հին եկեղեցին կը քանդուի 828 ին՝ երբ Ս. Մարկոս Աւետարանչի մարմինն Եգիպտոսէ բերուելով այս նոր հրաշակերտը կը կանգնեն:

Մարտիրոս եպիսկոպոս քասնեւինն օր Վենետիկ այցելելէն վերջ՝ ծովով կը մեկնի Անքոնա, յետոյ կ'անցնի Հռոմ՝ հինգ ամիս մնալով հոն: Կը պատմէ իր ուխտը Ս. Պետրոսի և Պողոսի գերեզմաններուն վրայ և երիցս Ս. Պապէն ընդունուին և յանձնարարական նամակ առնելը:

1491 Յունիս 9 ին կը թողու Հռոմը և կ'ուղղուի դէպի Զուրիցերի, Գերմանիա, այցելելով հեռոցհեռէ Գոստանցա, Պազիլէա (Պազէլ), Ֆրանքֆուրթ, Ֆրիսլուրկ, Սթրազպուրկ, Գապէլ, և հուսկ Քոլոնիա, ուր կը նկարագրէ այդ քաղաքի հին և հարուստ մայր եկեղեցին: Հոս ալ 22 օր մնալէն յետոյ Հոկտ. 25 ին կը մեկնի և կը հանդիպի Էքս-լա-շափէլ, կ'անցնի Ֆլանտրէն՝ ուր շատ կը նեղուի տեղւոյն լեզուին անձանօթ ըլլալով: Երկար ճամբորդելէն վերջ կը հասնի յաշխարհն Ընկլզաց, այսինքն Անգղիա, սակայն դժբախտաբար լաբլեայն կ'անցնի այդ երկրի մասին: Ապա կը վերադառնայ Գաղղիա և դէպի հարաւ ուղղուելով Բարիզ՝ նախ օր մը կանգ կ'առնէ և կ'այցելէ Սան Տօնիթ (St. Denis)՝ Ս. Դիոնիսիոս, ուր թագաւորներու գերեզմանները

1. Տես Կ. Յ. Բասմաջեանի «Բանասէր», հտ. Ա. Գիրք Գ. էջ 218-235, հր. Բարիզու Ազգ. Մատ. հայերէն Թ. 3 ձեռագրէն (ըստ Բասմաջեանի՝ Թ. 10):